

दिनांक 18.02.2025

समय: 18.45 बजे

- राज्य रो माली साल 2025–26 रो बजट काल—उपमुख्यमंत्री अर वित्त मंत्री दिया कुमारी विधानसभा मांय संवारे 11 बज्यां पेश करेला।
- केन्द्रीय जलशक्ति मंत्री सी.आर. पाटिल कहयो—देश ने साल 2047 ताँई जल सुरक्षित राष्ट्र बणावण सारू असरदार कार्य योजना बणा र काम कर्यो जा रहयो है।
- राजस्थान समेत 26 राज्यां अर केन्द्र रा राज वाळा प्रदेशां रा 152 शहरां सारू आज नवशा प्रोजेक्ट सरू करी ज्यो—शहरी सम्पत्ति रा नवशा बणावण सागे ई जायदाद रो रिकॉर्ड दुरुस्त व्हेला।
- राइजिंग राजस्थान रा तैत खनन हलका ऊं जुड़या 30 हजार करोड़ रुप्पा ऊं बत्ता रा करार माथे काम कर्या जा रहया कामां रो जायजो लेवण सारू मीटिंग राख्यी ज्यी।

000

वित्त मंत्री दिया कुमारी विधानसभा मांय काल संवारे 11.00 बज्यां राज्य रो माली साल 2025–26 रो बजट पेश करेला। वे आज बजट ने फाइनल कीनो। ई मौके अतिरिक्त मुख्य सचिव अखिल अरोड़ा, प्रमुख शासन सचिव देबाशीष पृष्ठि, शासन सचिव नवीन जैन, शासन सचिव कुमारपाल गौतम अर निदेशक, बजट बृजेश किशोर शर्मा मौजूद हा। राज्य री मौजूदा सरकार रो ओ दूजो बजट है। बजट ऊं नौजवानां, किसानां अर महिलावां समेत न्यारा—न्यारा तबकां ने कई ऐलाण री उम्मीद है। भीलवाड़ा ज़िला रा एक किसान कहयो के बजट मांय किसान क्रेडिट कार्ड रे ज़रिए लिया ज्या कर्ज माफ़ करण अर खाद—बीज टेम सर मुहैया करावण री व्यवस्था करण रा ऐलाण कर्या जावणा चाहिजे।

.....
पाली मांय सी.ए. कर रही छात्रा लहर रोहट मांय बेगा ऊं बेगा कारखाना लगावण ऊं जुड़या ऐलाण री उम्मीद जतायी।

000

जलशक्ति मंत्री सी.आर. पाटिल कहयो है के भारत ने साल 2047 ताँई जल सुरक्षित देश बणावण रा मकसद ऊं असरदार कार्य योजना माथे काम कर्यो जा रहयो है। वे आज उदयपुर मांय वाटर विज़न सम्मेलन मांय बोल रहया हा। श्री पाटिल कहयो के नुवी पी.के.सी. लिंक परियोजना ऊं आवता बगत मांय प्रदेश ने मोटी तादाद मांय पाणी री पूर्ति तैय करी जा सकेला। वे जल जीवन मिशन ने पाणी री परेशानियां आगी करण रो असरदार ज़रियो बतायो। जलशक्ति मंत्री कहयो के ई मिशन रा तैत देश रा 15 करोड़ घरां मांय पीवण रो साफ़ पाणी मुहैया करायो जा रहयो है। केन्द्रीय मंत्री कहयो के बिरखा रो पाणी भेळो करण सारू लगातार काम चलाया जा रहया है।

.....
कार्यक्रम मांय मुख्यमंत्री भजनलाल शर्मा कहयो के पाणी बचावण रा जतन कर र पाणी रा हलका मांय खुद रे पाण ऊबा व्हेवण री दिशा मांय आगे बढ़यो जा सके है। वे कहयो के जल आत्मनिर्भरता सारू सुव्यवस्थित रोड़ मैप री ज़रूरत है। मुख्यमंत्री कहयो के इण मांय खेती—बाड़ी अर शहरी जल प्रबंधन अर तकनीकी नवाचार रा पहलू ई शामिल कर्या जावणा चाहिजे।

ई पाछे जलशक्ति मंत्री महाराणा प्रताप गौरव केन्द्र परिसर मांय कर्मभूमि से मातृभूमि अभियान रा तैत जल संचय—जनभागीदारी रा अंतर्गत बोरवैल कार्यक्रम री सरूआत कीनी। कार्यक्रम मांय ओडिशा रा मुख्यमंत्री मोहन चरण मांझी अर त्रिपुरा रा मुख्यमंत्री माणिक साहा, जल शक्ति राज्यमंत्री राजभूषण चौधरी, राज्य रा जल संसाधन मंत्री सुरेश रावत अर कई राज्यां रा जल संसाधन मंत्री मौजूद हा।

000

चुनाव आयुक्त ज्ञानेश कुमार ने मुख्य निर्वाचन आयुक्त बणायी ज्या है। वे केरल कैडर रा 1988—बैच रा रिटायर्ड आई.ए.एस. अहलकार है। ई सागे ई डॉ. विवेक जोशी ने नुवा चुनाव आयुक्त बणायी ज्या है।

000

राजस्थान समेत 23 राज्यां अर केन्द्र रा राज वाळा तीन प्रदेशां रा 152 शहरां मांय आज नक्शा प्रोजेक्ट सरु करी ज्यो। केन्द्रीय कृषि अर किसान कल्याण मंत्री शिवराज सिंह चौहान मध्यप्रदेश रा रायसेन ऊं इण री सरुआत कीनी। ईं मौके वे कहयो के नक्शा कार्यक्रम ऊं जायदाद रा नक्शा बणेला अर संपत्ति रो रिकॉर्ड दुरुस्त कर्यो जा सकेला, जिण ऊं ज़मीं ऊं जुड़्या झगड़ा-टंटा कम करण मांय मदद मिलेला।

.....

प्रदेश मांय नक्शा प्रोजेक्ट री सरुआत रो कार्यक्रम जयपुर मांय राख्यी ज्यो। इण मांय नगरीय विकास अर आवासन मंत्री झाबर सिंह खर्ग कहयो के ईं परियोजना ऊं शहरां मांय जायदाद रो सटीक सीमांकन व्हे सकेला अर शहरी विकास हलकां मांय ज़मीं ऊं जुड़ी प्रक्रिया साफगोई सागे तुरत पूरी व्हेला। वे कहयो के इण ऊं लोग वां री जायदाद री जाणकारी ऑनलाइन कर सकेला। प्रदेश मांय ईं प्रोजेक्ट सारु भिवाड़ी, बगरु, बहरोड़, किशनगढ, ब्यावर, अर नाथद्वारा समेत दस ठोडां चुण्यी ज्यी है। आं मांय ड्रोन सर्वे रे जरिए डिजिटल मैपिंग करवा र ज़मीं रा हक ऊं जुड़्या रिकॉर्ड ने डिजिटल बणायो जावेला। ब्यावर मांय ईं कार्यक्रम रो सीधो प्रसारण बतायी ज्यो, जिण ने ज़िला कलेक्टर समेत मोटी तादाद मांय लोग देख्यो।

000

राइजिंग राजस्थान रे दौरान खनन हलका ऊं जुड़्या 30 हजार करोड़ रुप्या ऊं बत्ती रकम रा करार ऊं जुड़्या काम सरु व्हेवण लाग्या है। खान विभाग रा प्रमुख शासन सचिव, टी. रविकान्त बतायो के आं मांय एक हजार करोड़ रुप्या ऊं बत्ता रा 20 अर सौ करोड़ ऊं एक हजार करोड़ रुप्या ताईं रा 25 करार शामिल है। श्री रविकान्त समिट रे दौरान माइनिंग हलका सारु करी ज्या करार ऊं जुड़्या कामां री प्रगति रो आज जायजो लीनो। वे बतायो के निवेश रा प्रस्ताव देवण वाळां सागे विभाग लगातार संपर्क राख रहयो है।

000

दौसा मांय बाइपास कने आज कार अर ट्रेलर री टक्कर रे कारण पांच जणां री मौत व्हे ग्यी अर दो जणा ज़ख्मी व्हे ग्या। दौसा रा डी.एस.पी. रवि प्रकाश शर्मा बतायो के कार मांय सवार लोग प्रयागराज महाकुंभ मांय जा र पाछा आ रह्या हा।

.....

उत्तर प्रदेश रा इटावा मांय ईं कार अर ट्रक री टक्कर रे कारण भरतपुर ज़िला रा नदबई हलका रा तीन जणां री मौत व्हे ग्यी अर दो जणा घणा ज़ख्मी व्हे ग्या। अ लोग ईं महाकुंभ मांय जा र पाछा आ रह्या हा। दूजी कानी बीकानेर ज़िला रा नोखा हलका मांय एक सरकारी स्कूल मांय खेलती बगत पाणी रा टैक मांय पड़ जावण ऊं तीन टाबरियां री मौत व्हे ग्यी।

000

वरिष्ठ नागरिक तीर्थ यात्रा योजना रा तहत आज पाली ऊं मुफ्त भारत गौरव रेलगाड़ी रवाना व्ही। इण मांय 776 मुसाफिर है। आ गाड़ी अयोध्या, हरिद्वार अर ऋषिकेश मांय दर्शन करावेला। देवस्थान विभाग रा सहायक आयुक्त रेल ने ढोल-नगाड़ां बीचे हरी झंडी बता र रवाना कीनी। इण रा एक मुसाफिर हनुमान भाटी बुजुर्गा सारु मुफ्त तीर्थ यात्रा योजना चलावण बाबत् राज्य सरकार रो आभार जतायो।

000

राज्य मांय पश्चिमी विक्षोभ रा असर ऊं लारला 24 घंटां रे दौरान जयपुर, जोधपुर अर बीकानेर संभाग मांय केई ठोडां छांटो-छिड़को व्हयो। बीकानेर, श्रीगंगानगर, जैसलमेर अर बाड़मेर ज़िलां मांय ईं बादला मंड़्या रह्या अर केई हलकां मांय ज़ोरदार बायरो बाज्यो। आवता दो दिन ताईं एड़ो ईं मौसम रेहवण रा आसार है। शेखावाटी मांय काल तेज बायरो बाजण अर हल्की बरसात री संभावना है।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय 23 फरवरी दीतवार ने विचार बतावेला। आ ईं कार्यक्रम री 119वीं कड़ी व्हेला। ईं कार्यक्रम सारु आप ईं 21 फरवरी ताईं राय मुफ्त नम्बर 1800-11-7800 माथे भेज सको हो। ईं रे अलावा 1922 नम्बर माथे मिस्ड कॉल रे जरिये मिल्या लिंक ऊं ईं राय दी जा सके है। आप नरेन्द्र मोदी एप अर माई जीओवी ओपन फोरम रे जरिये ईं राय दे सको हो।

000